



UPA 2015/22
05. maj 2015
Peter Olsen

Nunatta inuiattut timersornikkut unammersuarterfissaanik qulisamik "National stadion"-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Pilersitsinissamut pilersaarummi misissorneqassapput unammersuarterfissap ingerlanneqarnerani sanaartornissamilu aningaasatigut pissutsit atuuttussat (Inatsisartunut ilaasortaq Anders Olsen, Siumut)

Inatsisartunut ilaasortaq Anders Olsen siunnersuuteqarpoq; Naalakkersuisut peqquneqassasut, Nunatta inuiattut timersornikkut unammersuarterfissaanik qulisamik "National stadion"-imik pilersitsinissaq siunertaralugu misissuinisamik aallartsitseqqullugit.

Siullermik siunnersuuteqartumut Anders Olsen-mut qujanarujussuaq uunga oqaluuserisassatut siunnersuutigisimasannut soqutiginarumut pissanganartumullu. Torrak nuanneq tassa ajunngilluinnarpoq.

Isumaqarpunga tulluartaussasooq oqaluuserisassamut uunga tunngatillugu, siornatigut oqaluuserisassangortinneqarsimasumut akissuteqaatigisimasara, tassalu Timersornermut højskoleqalernissaq pillugu Atassutikkut siunnersuutaannut akissuteqaatigisimasara issuaafigalugu aallartikkuma tulluartaussasooq, imatullu taamani aallartippunga; Issuaaneq aallartippooq;

“Aallarniutigalugulu Inuit Ataqatigiinniit oqaatigerusupparput assorsuaq nuannaarutigigatsigu, massakkut – upernaakkut inatsisartut ataatsimiinnitsinni timersornermut kulturimullu tunngasunik arlaqartunik oqaluuserisassangortitsisimanerput pissutigalugu.

Taassuunakkut ersersinneqarmat inatsisartunut ilaasortaasugut arlaqartugut timersornermik kulturimullu tunngasunik soqutigisaqarluartuusugut pingaartitaqartuusugullu.

Qularnanngilarlu timersortartut aammalu kulturilerisut akornanni, inatsisartuniit soqutigineqarnertik assorsuaq nuannaarutigisagaat.

Qilanaarpugut suleqataanissatsinnut suleqatigiilluarnissatsinnullu, neriuppugullu ukioq manna ataatsimiiffiusooq timersornikkut kulturilerinikkullu angusaqarfiulluarumaartoq.

Ukioq mannalugu kulturip timersornerullu ukiuattut oqaatigineqarsinnaannguatsiarunarpoq.”
Issuaaneq naavoq.

Anders Olsenip siunnersuuteqarnermini tunngavilersuutaasa pingaarnersaasa ilagaat nunatsinni nationalstadionimik pilersitsinikkut timersornerup silarsuaani pingaartumik arsaattartoqarnitta tungaasigut alloriaqqittoqarnissaa ineriartortitseqqinnissarlu.

Tamatumuma kingunerissagaa nunatta nunanut allanut unammisartuisa nunatta iluani nunanut allamiunut unammisinnaangornissaat, assersuutigineqarlutik ilaatigut; Tuluut, Franskit, Spaaniamiut, Brasiliamiut, Argentinarmiunullu unammisinnaalissallutit.

Ilumut, qanorlimi nuannertigissagaluarpaa Brasiliamiut arsaattartui maanga unammiar-torsinnaalissagaluarpata. Assaa immaqaa tamarsuatta isiginnaariakaassagaluarpoo.

Sinnattuaqilaartarluni aamma ajunngilaq, sinnattummi aamma piviusunngortarput upperalugit anguniarlugillu pimoorussilluni iliuuseqarsinnaagaanni.

Arsaattartulli kisimik eqqarsaatigineqanngillat, national stadion qulisaq aamma atletikkimut atorineqarluaarsinnaanera Anders Olsenip saqqummiuppaa; soorlu 100 m-mut, 200 m-mut, qummut pissittaarnerit aamma tamakku eqqaaneqarsinnaasut ineriartortinneqarsinnaasullu aamma taakkartorneqarput.

Tamakku ilaatigut tunngavigalugit nunatta national stadionimik qulisamik sanasoqassagaluarpaa qanoq ittuunissaanik qanorlu naleqarsinnaaneranik, qanorlu aningaasalersorneqarsinnaaneranik misissuisoqarnissaanik – pilersaarusiortoqarnissaanik naalakkersuisut peqquneqarnissaannik Anders Olsen siunnersuuteqarpoq.

Inuit Ataqatigiinniit oqaatigissavarput siunertaq anguniagarlu paasilluaqqinnaaratsigu tapersersorluinnaqqissaarlugulu.

Politikkimik suliaqartuusugut tamatta soqutigaaqarput inuiaqatigiit timikkut tarnikkullu peqqissut nukittuullu pilersissallugit, tamannalu pissaaq peqatigiiffiit annertuumik pinaveersaartitsinermik suliaqareersut suleqatigalugit. Taamaamat pisariaqarpoq kulturimut timersornermullu tunngasut samminerulernissaat, taakkualu immikkut ineriartortinneqarnissaat inissaqartissallugu. Pissutigalugu timersorneq kulturilu ima assigiinngitsigimmata allaat assersuunneqarsinnaallutik, soorlu tassa igasunngorniaq aammalu qalipaasuungorniaq.

Tamatta nalunngilarput timersorneq peqatigiiffilerinerlu inuiaqatigiinnut qanoq pingaaruteqartigisoq. Timersorneq peqqissusermut pingaaruteqarpoq. Taamatuttaaq peqatigiiffilerineq timersornerullu anersaava inuiaqatigiinni, sumiiffinni ataasiaakkaani nunarpullu tamakkerlugu, ataasioqatigiinnermik pilersitsisarpoq.

Aammattaaq nalunngilarput Ilulissani ivigaaraasalimmik arsaattarfittaarniaqatigeeqartoq aamma taakku suleqatigiit nersualaagassapput namminneq piumassusertik tunngavigalugu, pisortanik utaqqinngikkaluarlutik suliniuteqarsinnaanerat pissutigalugu.

Torraq tassa ajunngilluinnarpoq ingerlalluarnissaannillu iluatsitsilluarnissaannillu Inuit Ataqatigiinniit kissaatiinnassavagut.

Nalunngilarputtaaq Qaqortumi, Maniitsumilu ivigaaraasalinnit arsaattarfeqalernikuusut, minnerunngitsumillu aamma Qeqertarsuarmiut (pitaartussanngornikuusut) **sulissuteqartut** nalunngilagut. Sineriassuarput angeqimmat immaqaliaa sineriassuatta iluani suli allanik suliniuteqartoqartoq sianginnginnerparput?

Torraq, tassa ajunngilluinnarpoq qanortoq aamma suli nammineerluni suliniuteqarnikkut pilersitseqatigiissinnaanerat sineriassuatsinni annertusiartulerniarlik.

Taamaattumik Iluliarmiut, Maniitsormiut, Qeqertarsuarmiullu suleriaaserisimasaaq iluatinnaateqarpallaaqimmata maligassaalluarlutillu, taamaattumik Inuit Ataqatigiinniit inassuteqaatigerusukkipput naalakkersuisut taamatut pilersaarusiornermi innuttaasunik qanimut suleqateqarluaarnissaat, pilersaarusiornermi peqataasinnaaqqullugit sunniuteqaqataasinnaaqqullugillu, taamaalilluni innuttaasut piginneqataasutut misigisimalersinneqarnissaat eqqarsaatigalugu pingaartillugu.

Tamanna pingaaruteqarluinnaqqissaarpoq, innuttaasut piginneqataasutut suleqataasutullu misigisimatinneqarnissaat, tamattami nalunngilarput peqatigiiffiit qanoq pinaveersaartitinermit sunniuteqarluarsinnaatigisut.

Taamatut oqaaseqarluta Inuit Ataqtigiinniit taperserlugu ataatsimiisitaliamut susasaqartumut aappassaaniinginnermini suliarineqartussanngorlugu ingerlateqqipparput.